

D'Landwirtschaft viru groussen Erausfuerderungen

Usprouch vum Jeff BOONEN, President LJB&JW

Léif Éieregäscht,
Dir Dammen an Dir Hären,

Et ass fir äis eng grouss Freed och dëst Joer nees den Här Ärbëschof Jean-Claude HOLLERICH hei bei äis ze begréissen.

Här Äerbëschof,

Dir hutt dat lescht Joer bemierkt, datt d'Thematik vun der Agrarpolitik lech nach net esou läit, mee datt Dir lech fir eis Uleies interesséiert an datt Dir eisen Engagement ënnerstëtzt.

Mir sinn dankbar, datt Dir eng ganz gutt Nues hat, wéi Dir den Abbé Romain Richer dat lescht Joer zum neien Nationalaumônier vun der *Lëtzebuenger Landjugend - Jongbaueren a Jongwënzer* ernannt hutt. De Romain huet sech ganz séier an eis Verbänn agelieft an hien ënnerstëtzt äis elo mat vill Enthusiasmus bei all eise ville Projeten. Mir léiere vun him an hie léiert vun äis. Mir sinn iwweezeegt, datt dat an Ärem Sënn ass, an hoffen, datt mir nach munch Weeër mat him zesumme goen kënnen.

Léif Leit hei am Sall,

Ech behaupten, dass mir e gutt an erfollegräicht Joer hannert äis hunn. Mir hu beispillsweis de 25. Anniversaire vun der ekologescher Landwirtschaftsberodung am Kader vun der dësjäreger *Foire Agricole* gefeiert. Dës innovativ Berodung, déi mir zesumme mam *OekoZenter Lëtzebuerg* organiséieren, huet dëst Joer e richtegen Opschwung erlieft. Dat ass deelweis drop zréckzeféieren, datt mir zënter dem Abrëll déi dynamesch a sympathesch Beroderin, d'Madame Katharina David agehallt hunn. Am Kader vun dëser flotter Zesummenaarbecht hu mir eisem Minister an der zoustänneger Chamberkommissioun ganz konkret Propose fir eng Eewäisstrategie zu Lëtzebuerg ënnerbreet. An eiser agrarpolitescher Stellungnahme komme mir geschwënn op dese Punkt zréck.

Mir hunn awer och ganz aktiv um Niveau vum CEJA, dem europäesche Conseil vun de Jongbaueren, matgeschafft. Mir si frou, datt déi vill Propose vum CEJA, fir eng besser a méi effizient Jongbauerepolitik, vum EU-Kommissär - awer och vun eisem zoustännegen Minister acceptéiert ginn. Dëst ass net ëmmer selbstverständlech: Vill Länner notzen d'Méiglechkeete fir hir Jongbaueren net aus.

Léif Éieregäscht,
Dir Dammen an Dir Hären,

Erlaab mir, fir awer och nach kuerz no vir ze kucken.

D'Landwirtschaft steet weltwäit viru groussen Erausfuerderungen. Am Joer 2050 musse Liewensmëttel fir 9 Milliarde Mënsche produzéiert ginn. An eisem Präsidium war dofir relativ schnell d'Iddi opkomm, fir fir den Owend e Referent ze invitéieren, deen sech mam Thema

vun der Welternährung beschäftigt. Mir hunn äis gefrot, wou eis Verantwortung an dëser Problematik läit an op déi europäesch Landwirtschaft mat enger Produktiounssteigerung zu der Léisung vum Problem bäidroen kënn. Ech sinn dofir immens frou, dass mir mam Här Benedikt HAERLIN, e kompetente Referent fonnt hunn, deen äis elo gläich e puer Denkestéiss gëtt an opweist wou déi ekologesch a sozial Erausforderungen - déi op äis duerkommen - leie wäerten.

Ech wëll awer grad elo am Ufank vum Owend op zwou Erausforderungen am Zesummenhang mat der Lëtzebuerger Landwirtschaft agoen.

Déi ekologesch Erausforderunge ginn ëmmer méi grouss. Den Drock vun der Landwirtschaft op eis Ëmwelt ass reell an et mussen Ännerungen am Betriebsmanagement gemaach ginn, fir d'Ressourcën besser ze schounen. Mir Baueren hunn awer eis Problemer mat dem *Greening*, de Biodiversitéitsoplagen an aneren Ëmweltoplagen. Dat mat Sécherheet net, well mir d'Natur net wëlle schounen, mee well all dës ekologesch Oplage bei äis op de Betriber zum soziale Problem ginn: Si bedeite meeschtens en Aschnëtt am Akommes. D'Konsequenz dovun ass, datt an de villen Diskussiounen den ekologesche Problem net méi mat objektiven Ae gekuckt gëtt. Doduerch hu mir ganz schwaach Argumenter vis-à-vis vun enger Lobby, déi sech fir den Ëmweltschutz asetzt.

Deeselwechte Phänomen gesäit ee bei der Ausgläichszoulag. Ech froe mech, firwat mir alles a Bewegung musse setzen an Energie verschwenden, fir datt eist Land geophysikalesch benodeelegt bleift. Mir mussen eis klimatesch a pedologesch Konditiounen acceptéieren an sollen äis freeën, datt mir eis Flächen net an extreme Konditiounen bewirtschafte mussen. Eis Landwirtschaft ass natierlech defavoriséiert, mee dat virun allem um sozialen a wirtschaftleche Plang. Mir liewen an engem Land mat deem héchste Liewensstandard an Europa - eis Landwirtschaft muss awer hir Suen op engem liberalen Europa- a Weltmarkt verdéngen. De Service d'Economie Rurale weist scho jorelaang drop hin, datt d'Lëtzebuerger Landwirtschaft all Schwierigkeiten huet, fir en ähnlecht Akommes ze erwirtschaften, wéi dat an aneren Aktivitéitsberäicher de Fall ass.

Mir mussen dofir hei zu Lëtzebuerg déi ekologesch a sozial Problematik trennen. Ech hunn dat lescht Joer schonn hei ugedeit, datt mir net laanscht eng Sozialprime an der Landwirtschaft kommen. Ech fuerderen déi zoustänneg Instanzen op, sech am Kader vum nächsten Agrargesetz, Gedanken ze maachen, wéi déi ausgesi kënn. Et wier bestëmmt méiglech, d'Familljenaarbechtskraaft op de Betriber ze ënnerstëtzen. Fir eng Ineffizienz ze verhënneren, kënn dës Hëllef jo den Deckungsbeitrag vum Betrib mat berücksichtegen.

Op jiddwer Fall wieren d'Landwirtschaft an den Ëmweltschutz déi grouss Gewënner vun esou enger Trennung - well dann emol objektiv diskutéiert a motivéiert kënn ginn. Eist Akommes wier da gesécher an d'Motivatioun fir Klima, Aarten- a Waasserschutz ze bedreiven, wier mat Sécherheet méi grouss.

An Zukunft musse mir awer och eng proaktiv Haltung vis-à-vis vun den ekologeschen a sozialen Erausforderungen unhuelen. Ech hat d'Geleeënheet fir virun engem gudden Mount den Här Michael HAMILL, Chef vun der landwirtschaftlecher Abteilung an der DG Environment vun der EU-Kommissioun, ze héieren. Hien huet ganz kloer drop higewisen, datt d'Landwirtschaft net soll waarden, bis datt d'EU se iwwer Gesetze forcéiert, fir déi zukünfteg Ëmweltziler ze erreechen. Een aktuell Beispill sinn d'Sperrfriste fir Gülle um Gringland. Hei sinn d'Ziler net erreecht ginn, sou datt gesetzlech gehandelt gouf. Mir mussen ähnlech Situatiounen an Zukunft verhënneren, well se der Landwirtschaft schueden. Dëst geet nëmmen iwwer de Wee vun objektiver Recherche, vu Pilotprojeten, iwwer d'Weiderbildung an d'Berodung. Am nächsten Agrargesetz musse ganz kloer Budgete fir dës Poste virgesi ginn. An all wirtschaftlechtem Secteur spillen d'Recherche an den Developpement eng majoritär Roll, fir d'Nohaltegkeet ze garantéieren. Dat muss och esou an der Landwirtschaft de Fall sinn! Als klengen Denkestouss - fir eng proaktiv Haltung - wëll ech dëst Beispill ginn: Am Joer 2008 huet Frankräich de Plan *Ecophyto* an d'Liewe geruff.

Dëse Plang gesäit vir, datt de Pestizidasaz an der Landwirtschaft bis 2018 ëm 50 % reduzéiert gëtt – dat ouni d'Ertrëg ze gefährden. Duerch ugepasste Budgeten a mat der Koordinatioun vum Landwirtschaftsministère schaffen elo all d'Acteuren aus dem landwirtschaftleche Secteur un dësem Objektiv. Eng Reglementéierung ka verhënnert ginn an de Konsument, resp. Steierzueler huet e positiven Androck vun der Landwirtschaft.

Iwwer dëse proaktive Wee kënnen an Zukunft och ganz sécher eng Partie Erausforderunge vun der Lëtzebuenger Landwirtschaft geléist ginn.

Léif Éieregäscht,
Dir Dammen an Dir Hären,

Erlaabt mir, fir zum Schluss nach e puer Mercien auszuschwätzen, fir déi respektiv moralesch a finanziell Ënnerstëtzen, déi eiser Organisatioun zegutt kommen:

- Un déi Verantwortlech vum Landwirtschafts-, dem Nohaltegekeets- an dem Familljeministère an déi zoustänneg Verwaltungen. Mir si frou, datt mir esou e gudden an direkte Kontakt mat hinnen ënnerhale kënnen, a begrëissen et vun Häerzen, datt mir ëmmer nees Gehéier bei hinne fannen;
- Un all déi landwirtschaftlech Organisatioune mat deene mir zesummeschaffen;
- Un de Lycée Technique Agricole a speziell un d'Mme Direkter Martine Hansen, fir d'Raimlechkeeten, déi mir iwwer d'Joer erduerch an och haut nees gebrauche kënnen;
- Un de Bistum fir d'Bereetstelle vum Nationalaumônier a vum Permanent;
- Un eisen Nationalaumônier, den Abbé Romain Richer, deen äis - wéi scho gesot – mat Rot an Dot zur Säit steet.

Ech wëll och eis Leit an der Zentral am Centre Convict net vergiessen, deene keng Aarbecht zevill ass, fir äis ze ënnerstëtzen. D'Madame Kickert, déi scho bal 20 Joer op administrativem Plang fir eis Verbänn am Asaz ass, geet iwwerens elo am Dezember an hir verdéngte Pensioun.

Léif Madame Kickert,

Ech soen lech elo schonn e spezielle Merci, fir déi wäertvoll Aarbecht, déi Dir an all deene Jore fir äis an eis Virgänger geleescht hutt. Et ass nach ze fréi, fir lech elo schonn Äddi ze soen - mir kommen awer mat Sécherheet dat nächst Joer um Landjugenddag op dëse Punkt zrëck. Mir invitieren lech deemno, fir den 9. Mee 2013 zu Näärtreg derbäi ze sinn.

E grouse Merci geet och un d'Membere vum Nationalcomité a vum Präsidium, fir hire groussen Asaz am Interessi vun eiser Organisatioun, sief dat um nationalen oder europäeschem Niveau.

Meng lescht Mercie ginn un den Aarbechtsgrupp Zuucht an un all d'Memberen aus de regionale Gruppe vun der *Lëtzebuenger Landjugend – Jongbaueren a Jongwënzer*, déi dat ganz Joer iwwer ëmmer nees eng Hand mat upaken, wann si gebraucht ginn...

... an un lech all hei am Sall, datt Dir lech Zäit geholl hutt, fir den Owend derbäi ze sinn.